

# Specimen Medicum

INAUGURALE,

DE

# URINA:

QUAM,

Annuente summo Numine,

*Ex auctoritate reverendi admodum Viri,*

## GULIELMI WISHEART, S.T.D.

*Universitatis EDINBURGENÆ Præfeti;*

NEC NON,

*Amplissimi Senatûs Academici, & nobilissimæ  
Facultatis Medicæ decreto;*

## PRO GRADU DOCTORATUS,

Summisque in Medicina honoribus & privilegiis  
ritè ac legitimè consequendis,

Eruditorum examini subjicit

ARCHIBALDUS DRUMMOND *Scoto-Britannus,*

Ad Diem 25 Septembris, horâ locoque solitis.

---

EDINBURGI:

In Ædibus THO. RUDDIMANNI, M. DCC. XL.

Handwritten text at the top of the page, possibly a title or header.

Handwritten text in the upper middle section.

Handwritten text in the middle section.

Handwritten text in the middle section.

Handwritten text in the middle section.

Handwritten text in the middle section.

Handwritten text in the middle section.

Handwritten text in the middle section.

Handwritten text in the middle section.

Handwritten text in the middle section.



ILLUSTRISSIMO ET NOBILISSIMO DOMINO,

D. ARCHIBALDO,

*Comiti & Vicecomiti de ILAY,*

*Domino Orronfay, Dunoon & Arrofe ;*

Magni apud SCOTOS Sigilli Custodi,

Supremæ in Criminalibus Curiaë Præsidi, in Civilibus Senatori extraordinario, ex Sedecimviris à S. D. N. Rege ad Rempublicam administrandam constitutis uni ;

*Viro non magis amplissimis quibus fulget honoribus, quàm omnigenâ, quâ patet orbis scientiarum, doctrinâ conspicuo :*

Dissertationem hanc Medicam,

omni câ, quâ par est, observantiâ,

D. D. C. Q.

ARCHIBALDUS DRUMMOND.







# Specimen Medicum

INAUGURALE,

## *De URINA.*

I. **R**AGILIS adeo & caduca est corporis humani compages, ut ab iisdem conditionibus à quibus pendet ejus sanitas, ei quoque inducantur causæ dispendii. Nisi enim fluida per vasa perpetuò moverentur, omnes vitæ & sanitatis actiones impeditæ statim cessarent; & hic ipse quoque humorum motus, vitæ ac sanitati adeo necessarius, sine dubio deteret particulas plurimas solidas è vasorum lateribus, quæ tantum constant ex particulis fluidis inter se contextis; hæque particulæ detritæ, si corpori nutriendo ineptæ deveniant, inde auferuntur. Quædam quoque pars nostri alimenti, fluidi præsertim, etiam intra vasa lactea assumpti, & non idonea quæ in nutrimentum convertatur, sed pro vehiculo particulis nutrientibus tantum inserviens, sine diuturna mora expellitur. Præterea omnes nostri humores, si in calore non superante gradum caloris corporis sani aliquam-

A

quam-



quamdiu maneant, acres fiunt: quam ob causam, non modò corporis nutritioni haud diutius conveniunt, sed ei potius perniciem adferunt; & re verâ, si in corpore humano diutius quam par est retineantur, ex horum retentione symptomatum molestorum numerosa cohors fere semper ingruit. Quò itaque hæ particulæ, quæ ad corporis vires augendas tuendasque nihil conferunt, & illæ præsertim, quæ si manerent nocivæ evaderent, commodiùs eliciantur; natura, nobis semper benigna, vias plures instituit. Pars harum magna formâ transpirationis insensibilis, sudoris, muci è naribus, liquidi abundanter transeuntis per vasa intestinalia &c. & haud minima copia per vias uriniferas è corpore eliminatur; quæ ultima excretio est illa quam pro argumento hujus dissertationis selegimus. Quò meliùs verò huic tractandæ viam expediamus, non ab re erit de structura organorum, quæ hujus secretioni & excretioni inserviunt, quædam breviter tradere. Cum autem renes principem hîc sibi locum vendicent, ab iis auspicabimur.

II. Hi extra peritonæi cavitatem situm obtinent, ad utrumque latus vertebrarum inter ossa ilium & diaphragma, magnâ pinguedinis copiâ obvolvuntur, quò facilius partium vicinarum pressuram sustinere valeant, utque vasa renalia hoc oleo oblinita magis flexibilia maneant. Ad partem superiorem sibi incumbentes habent glandulas renales, de quarum usu inter anatomicos nihil adhuc certi constat. Ren sinister lienî subjacet, cui, membranâ cellulari interveniente, adhæret, sicut dexter hepatis: quamobrem sinister dextro plerumque altior; dexter non solum hepatis, sed intestino quoque cæco per membranam cellularem connectitur, dum sinister colo similiter conjungitur. Longitudine in adultis plerumque quatuor circiter vertebrarum, latitudine vero trium fere digitorum, parte tamen superiore paulò latiores sunt quàm inferiore; & crassities dimidium ferè latitudinis æquat. Hæc tamen eorum moles varia est in diversis corporibus, & quandoque etiam in eodem corpore unus ren altero major reperitur. Renum latera exteriora convexa sunt, interiora autem, & quæ versus se invicem spectant, concava. In fœtibus superficiem habent adeò inæqualem, ut ex glandulis quasi variis coagmentati videantur; dum in adultis



adultis superficies eorum magis polita est, in quibus tamen nonnunquam priorum divisionum vestigia clare cernere licet. Præter peritonæum, quo pars eorum anterior tegitur, & tunicam cellularem pinguedine repletam, unusquisque ren accipit tunicam sibi propriam, quæ eum ingreditur cum vasis sanguiferis, quæ (vasa sciz.) arctè amplectitur, eorumque cum ramis per renis substantiam distribuitur.

III. Renibus arteriæ impertiuntur ab aorta, quæ ad primam lumborum vertebra perveniens, inter hanc & ultimam thoracis, ad utrumque latus, singulos ramos emittit, qui ab aorta exeuntes ad angulos deorsum paululum acutos, versus inferiora obliquè tendunt. Hi priusquam renis substantiam ingrediuntur, in duos, tres, quandoque etiam quatuor ramos finduntur. Denique renes ingressi per latus concavum in arcus flectuntur, & hi in alios arcus, ex quibus iterum alii arculi producuntur, usque dum perventum sit ad vasa minima quæ oculis perspicui possint. Horum ultima circa folliculos glandulares obvolvuntur, & ibi plexum reticularem efficiunt duabus folliculi membranis suffultum. Hæc vasa ultima urinam à sanguine fecernunt, & eam folliculis infundunt.

IV. Quòd hujusmodi glandulæ in rene humano existant, probabile videtur ab iis quæ apparent in dissectionibus animalium quorum renes compage laxiori gaudent. Magis adhuc confirmatur, renibus morbois inspectis; si enim ex quacunque causa folliculorum excretoria obstruantur, liquoris exitu impedito, & novas simul suppetias folliculis perpetuò acquirentibus, glandulæ in immensam molem distenduntur; dum parte subtiliori per vasa inhalantia absorptâ, liquor ibi spissescit. Glandularum igitur tali humore distentarum folliculi facilè observantur, & vasa circa eos obvoluta quandoque etiam cernuntur. Quòd verò tali obstructione de novo productæ fuerint hujusmodi glandulæ, nullâ veri specie affirmari potest.

V. Cæterum quamvis statuam hanc urinæ secretionem ope glandularum in renibus perfici, neutiquam tamen per hanc solam machinam hoc opus peragi asserere velim. Ruyfchius enim sæpe affirmat se potuisse ceram adigere per arteriam renalem, omnesque ejus ramos, in ductus ipsos uriniferos. Neque hæc  
cera



cera per intermedium folliculum transivit, aliter folliculus iste distentus mansisset; quod tamen sibi nunquam contigisse profitetur. Inde apparet hanc injectionem per ramos laterales ab arteria renali emissos, in ductus Bellinianos, & tandem in pelvim pervenisse. Interim ait se nunquam observasse folliculum glandularem in rene cui hanc ceram injecerat, quod quidem haud mirum videtur. Omnibus enim notum, quòd quò magis vas aliquod magnum extenditur, eò magis vasa omnia parva vicina comprimuntur. Cum itaque hæc cera per finem arteriæ intra folliculi cavitatem viam sibi aperire non potuit, sed ad vasis os impedita hæsit, arteriæ omnes quæ folliculo obvolvuntur eò magis distentæ hunc adeo comprimunt, ut aciem oculorum penitus aufugiat; postea verò dum partem ita præparatam in aqua tepida macerat, vasa quæ cerâ istâ balsamicâ, putredine resistente, plena sunt, in aqua tepida non destruuntur, dum folliculus nullo tali liquore repletus citò in tabem diffluit. Hoc itaque ejus experimentum probat tantum vasa lateralia ampliora esse orificiis vasorum quæ glandulis inferuntur; & cum urina constet diversis partibus, vasa lateralia secernunt forte partem crassiorē, dum tenuior intra folliculos glandulares transit.

VI. Ex argumentis igitur in utramque partem allatis verisimile admodum videtur, secundum sententiam celeberrimi Boerhavi urinam à sanguine secerni, & per arteriolas circa glandularum folliculos obvolutas, & per vasa lateralia.

VII. Reliqua sanguinis massa, quæ post urinæ secretionem remanet, per venas proprias, reptatu ab illo arteriarum diverso, reducitur in quatuor vel quinque truncos majores, qui iterum in unam venam magnam, emulgentem dictam, ad utrumque latus sensim coalescunt, quandoque ante, aliquando etiam postquam ex renis substantia exierint. Hæc denique vena sursum obliquè transiens venæ cavæ inferitur angulo deorsum acuto, cui sanguinem suum infundit, dum lymphæ superstes in alveum chyli per vasa lymphatica reducitur.

VIII. Præter arterias & venas renibus quoque tribuuntur nervi, pauci quidem numero, si magnitudinem hujus visceris spectemus, qui tamen ad usus omnes necessarios accommodati videntur. Hi nervi ad renes perveniunt ab intercostalibus; qui  
quàm



quamprimum per diaphragma transferint statim supra arteriam cæliacam ganglionem efficiunt, qui præter eos quos renibus impendit, alios quoque ramos ventriculo, intestinis & testibus supeditat. Unde obiter patet quare nausea, vomitus, & retractio testis lateris affecti paroxysmo nephritico perpetui adsunt comites.

IX. Urina à sanguine jam secreta, more supra tradito, fertur, vel per vasa excretoria glandularum, vel per vasa lateralìa intra ductus Bellinianos cum quibus continuantur. Hi versus interiora tendentes tandem colliguntur in undecim, duodecim, quandoque decem solummodo papillas, quæ respondent tot ramis pelvis, quibus quasi sacculis recipiuntur; dum uniuscujusque papillæ pars magna libera pendet intra marginem sacculi. Pelvis rami, qui ab his sacculis origines suas deducunt, ulterius progressi, cum se invicem communicant, ita ut omnes simul tres tantum saccos majores efficiant. Quorum unus ad partem renis mediam & posteriorem, alter ad superiorem, tertius ad inferiorem collocatur. Hi tres rami statim egressi ex substantia renum, seu parvo saltem intervallo, in unum canalem, *ureterem* dictum, coalescunt. In primum igitur horum canalium ordinem urina excipitur è papillis destillans, inde in tres majores ramos, denique in ureterem compositum ex his tribus canalibus in unum conjunctis serpit.

X. Ureteres renibus egressi, obliquè deorsum tendentes cursum flexuosum servant, supra musculos psoas & vasa iliaca transeunt, inter vesicam & rectum decurrentes, parti vesicæ posteriori inferuntur; distantiâ ferè duorum digitorum ab ejus cervice, & tot à se invicem, tunicam vesicæ externam penetrant; deinde inter hanc & interiorem aliquamdiu obliquè serpentes intimam quoque tandem perforant. Postquam inter vesicam penetraverunt, ulterius producti corpuscula rotunda efformant.

XI. Unicuique reni unus tantum ureter plerumque inservit: quandoque tamen, licet rariùs, unus ren duos habet ureteres; qui paulo antequam vesicæ inferantur coeunt; aliquando eam separatim intrant: immo exempla memorantur ubi ureter in renis substantia varios quasi sinus efficiens inde egressus in duos, tres, quatuor, vel etiam quinque æquales ramos descissus reperiebatur;



riebatur; & talis quidem ureteris divisio admodum necessaria est, si ren plures habeat pelves inter quos nullum intercedit commercium.

XII. Ureter in cadavere hominis, qui illum obstructum nunquam habuit, pennæ anserinæ magnitudinem rarò superat, ejus tamen quædam partes cæteris arctiores conspiciuntur; & exempla quoque apud auctores extant ubi multum ultra hanc molem distensi reperiuntur, & si semel ultra molem consuetam augeantur, rarò vel nunquam priorem angustiam recuperant: quòd à natura optime comparatum; quo sciz. lenior fiat sævus ille dolor, quem calculi per ureteres detrusi aliter excitarent. Cum enim qui hoc morbo semel correpti fuerunt rarò per totum vitæ decursum ab eo omnino immunes sint, in his calculus per ureteres jam dilatatos transiens, viam sibi apertam inveniens, minore cum molimine progreditur, ideoque longè minus doloris quàm aliter ægro excitat.

XIII. Ureter constat tunicâ musculosâ ad urinam propellendam, & alterâ nerveâ dictâ plurimis glandulis cinctâ, quæ cum perpetuò effundunt ad ureteris cavitatem internam lubricam conservandam, & tunicam hanc contra urinæ acrimoniam defendendam: hæcque tunica intima epidermidi fere similis est; si enim, uti clariss. in hac academia Anatom. Profess. notat, reliquorum vasorum interna cavitas membranâ epidermidi affini obtegatur, certè hujusmodi membrana æquè saltem necessaria est hoc in loco ac alibi, ut sciz. internam canalis cavitatem investiat, qui liquorem acrem perpetuò transmittit.

XIV. Præter arteriam renalem, ureteres à trunco aortæ, eo ferè loco ubi cæliacam emittit, & etiam à spermaticis iliacisque, arterias accipiunt. Venæ arterias comitantur, quæ sanguinem venæ renali & splenicæ infundunt. Nervi ab intercostalibus iis impertiuntur.

XV. Urina per ureteres ita constructos, suo pondere, adjunctâ contractione canalium, descendit in vesicam. Hæc ad partem inferiorem abdominis in cavitate ab ossibus innominatis, sacro, & coccygis facta, & *pelvi* dicta jacet; inter os pubis & intestinum rectum in viris, uteri verò cervicem in foeminis. Umbilico conjungitur opè urachi, qui post partum, cum non  
ampliùs



amplius requiritur ad urinam devehendam, in ligamentum impervium degenerat. In viris quoque intestino recto, & in foeminis vaginæ uteri pars ejus posterior membranâ cellulari intermediâ alligatur; anterior verò ossi pubis persimilem membranam, & superior fundus dicta peritonæo conjungitur. Figura ejus aliquatenus ovalis est, circa inferiorem verò & posteriorem partem distenta protruditur pondere urinæ superincumbentis, propter situm erectum. Arterias & venas accipit ab iliacis internis, & nervos à cruralibus & intercostalibus, quosdam etiam a plexu mesenterico inferiori.

XVI. Duas habet tunicas, quarum prima, & quæ substantiam ipsius vesicæ maxime conficit, est muscularis, cujus fibræ quædam longitudinales sunt; dum aliæ se invicem intersecant. Secunda & intima tunicæ villosæ intestinorum analogâ, rugosa & plicata, epidermidi quoque affinis, plurimis suppeditatur glandulis ad internam vesicæ cavitatem oblinendam mucosâ, quem perpetuò per ductus excretorios effundunt, ne interior vesicæ membrana urinæ intra stagnantis acrimoniâ excorietur. Quam primum urina adeo acris fit, ut hujus tunicæ nervos stimulet, sequitur contractio fibrarum muscularium. Longitudinales deorsum & versus os pubis fundum ejus trahunt, dum reliquæ fibræ diametrum transversam minuunt; & cum nervi vesicæ irritantur, non solum fibræ musculares ei propriæ se contrahunt, sed diaphragma quoque & muscoli abdominales simili modo afficiuntur, hisque contractis reliqua viscera in vesicam vi premunt. Horum itaque actione & tunicæ muscularis contractu urina tandem expellitur per aperturam ad partem vesicæ inferiorem & anteriorem, quam circumdat fibrarum muscularium fasciculus *sphincter* dictus. Hic semper contrahitur, nisi cum urinam expellere nitimur; tunc enim urina, sicut cuneus in sphincterem contractum adacta, vi suâ latera sphincteris à se invicem separat; dum interim nervi ejus omnes ab urina comprimuntur, ita ut sphincteris vis contractilis debilitetur.

XVII. Urina hujusmodi artificio è vesica expulsa in urethram fertur, quæ est canalis mollis, membranofus, sensibilis admodum: statim à vesica exiens ascendit, deinde deorsum pergit; in foeminis brevis, sub clitoride, supra canalem magnum uteri sita,  
inter



inter nymphas, & infra glandem clitoridis se aperit; in viris longior, inter vesicam & glandis extremitatem currens: ad egressum ejus à vesica, prostaticis sustentatur, quibus firmiter adhæret per spatium digiti unius & dimidii; per reliquum decursum intra musculos acceleratores, & finem quem efficiunt corpora cavernosa, reconditur, sicut ureteres & vesica: hic quoque canalis ob eandem rationem magnam copiam muci accipit à glandulis, quarum excretoria intra ejus cavitatem se aperiunt.

XVIII. Arteriæ & venæ ei impenduntur ab hypogastricis, dum nervos à lumbaribus & sacris mutuatur. Ne autem urina stagnaret in hac parte urethræ, quæ inter glandulas prostaticas & corpora cavernosa jacet, ibi ornatur urethra duobus musculis, ab officio urinæ acceleratoribus dictis, qui ab extremitate prostaticarum orti origini corporum cavernosorum inferuntur, & cum hi se contrahunt, hanc partem urethræ comprimentes, omnem urinam inde ejiciunt. Hinc illi, qui habent hos musculos paralyticos, si post redditam urinam horum vicem supplere negligant, urethram circa hæc loca digitis comprimendo, urina ibi stagnans corrumpitur, hunc canalem irritat, inflammat, exulcerat.

XIX. Descriptis organis quæ urinæ secretioni & excretioni inserviunt, ordo postulat ut quædam de indole liquoris per hæc organa secreti memorentur. Circa urinam igitur sani hominis, solâ inspectione, sine ullo artis chemicæ auxilio, hæc observare licet. Colore citrino plerumque prædita est; paulo minus fluida reperitur quam aqua vulgaris, propter partes quasdam solidas ei innatantes; odorem habet leviter fætidum, saporem falsum. Si intra vas vitreum excipiatur, postquam aliquamdiu ibi steterit, quædam particulæ solidæ in ea cernuntur, quæ *contenta* vocantur, & pro diversa gravitate varia loca vasis occupantes diversa nomina fortiuntur. Harum levissimæ ad summum tendentes *nubeculæ*, graviores in medio hærentes *suspensa*, & gravissimæ cum fundum vasis petunt *sedimentum* sive *hypostasis* à medicis dicuntur. Horum autem duo priora intra urinam sani hominis modicè exercitati non semper reperiuntur: in his enim particulæ leviores, quæ nubeculas & suspensa

con-



constituunt, sæpe per cutis spiracula expelluntur; sedimenti autem partes per cutim transitum haud adeo facilem reperientes, ad renes plerumque feruntur. Hocque sedimentum, si homo sanus sit, ut plurimum est subalbidum, læve, æquale, non færens, mediocris quantitatis. Quando urina in vase aliquamdiu servatur, ad fundum ejus & latera crustam calculosam deponit, quæ firmiter vasi adhæret.

XX. Præter hæc verò quæ in urina, nullâ arte adhibitâ, observantur; si per experimenta chemica ad examen revocetur, constat eam nec acidi, neque alcalini quodcunque signum præ se ferre; revera tamen alcalescens est, & si in calore modico per dies aliquot retineatur, tandem etiam alcalina devenit; colorem citrinum in flavum, fuscum mutat, putrida acrisque fit; saporem acrem, ingratum acquirit, odor ejus putridus, fætidus evadit. Per chemiam quoque resolvi potest urina in aquam, oleum, terram, salem nativum, & etiam marinum, si modò homo tali usus fuerit. Sal urinæ nativus semifixus est, sed quodam caloris gradu volatilis redditur, & dum volatilis fit, simul quoque alcalinus devenit, & quo diutius in calore retinetur eo acrior efficitur. Ad salis ammoniaci naturam prope accedit: ab eo tamen hoc differt, quòd sal ammoniacus, licet calore definito volatilis effici possit, attamen, etsi sublimetur, alcalicus nunquam evadet. Oleum urinæ sanæ, licet blandum quodammodo sit, si tamen calor ei applicetur, rancidum, acre fit, & calore satis diu protracto, acerrimum devenit. Interim dum per gradus omnes putredinis ad summum usque virulentia procedit, eosdem diversos colores induit ac urina ipsa, et ab hoc quidem oleo varietas colorum, quæ in urina apparet, ut plurimum pendere videtur. Perspectâ naturâ hujus salis & olei, haud mirum videbitur, non solum colorem urinæ, sed ejus quoque saporem ita mutari ex causa quacunque corpus nimium calefaciente; & tot damna corpori inferri ex salis & olei retentione, præsertim in morbis acutis, ubi celeris est humorum motus, valida attritio, & calor vehemens inde natus. Ex hæcenus denique allatis apparet, quàm apta sit urina etiam sani hominis sibi commissâ in crustas calculosas coire: hæcque ejus indoles est scaturigo uberrima miseriarum quibus plurimi viri  
C clari,



clari, & quorum insignia in rem literariam merita exstiterunt, in senectute præsertim excruciantur. Cumque calculus ex natura urinæ ut plurimum pendeat, & nihil fere aliud sit quàm urina in massam solidam concreta, à proposito haud fortè alienum erit, si de ejus ortu, symptomatibus, & de iis que præcipuè indicantur, ut æger ab ejus molestia liberetur, paucula hic interponamus.

XXI. Calculus itaque ipse chemicè tractatus constare videtur sale, terra, oleo, phlegmate, & aëre. Hujus autem ortus referri potest,

*1mo*, Ad labem hæreditariam. Sicut enim parentes strumosi liberos eodem vitio fœdatos ut plurimum generant, ita, qui calculi dolores ipsi perpeffi sunt, haud rarò soboli sævissimum hunc morbum per successionem quandam tradunt.

XXII. *2do*, Ad impeditum urinæ transitum per vias sibi destinatas. Quemadmodum enim patet ex dictis, urinam quieti permissam, citò gignere crustam calculosam, similiter eo magis in concretionem vergit, quo propius ad quietem attingit. Ideoque, sive impediatur urinæ transitus per folliculos renis, sive per ductus Bellinianos, pelvim, aut vesicam, particulæ crassiores, relictis cæteris, abibunt in massam solidam, calculosam, eo promptius, quo majore vi in se invicem compinguntur.

Id autem fit, 1. Decubitu supino, quo premuntur renes per viscera abdominalia; dum altior vesicæ situs, decursui lotii per ureteres obstat, pelvim distendit, papillas renales, & totam denique renis substantiam obruit.

2. Nixu quovis valido corporis; eo siquidem aer intra distensos pulmones retentus, diaphragma detrudit deorsum, renesque suppositos comprimit.

3. Omni denique causâ obstructionis cujusvis, sive inflammatoria fuerit vel alia, quæ viscera uropœa infestat. Huc pertinet imprimis citatior cursus, equitatio & saltatio violentior, renum calefactio nimia, stimulantia intempestiva.

XXIII. *3tio*, Ad nimiam salis & terræ copiam in urina, cum calculi pars solida ex his maximè conficitur.

XXIV. *4to*, Ad nimiam urinæ tenacitatem. Hæc sese prodit per pelliculam, instar cremoris, ad superficiem quiescentis urinæ



urinæ rejectam, tum & per flocculos atque strigmenta illi innatantia: glutine hoc viscido irretitæ partes salinæ & terrestres, calculum gignunt.

XXV. 5to, Ad humorum corruptelam. Urina namque, quo magis corrumpitur, eo magis attenuata, citius deponit crustam calculosam ad latera & fundum vasis; quippe cum urina hæc attenuatur, particulæ fabulosæ facilius se expediunt ab humoribus ambientibus, & se invicem melius attrahunt.

XXVI. 6to, Denique ad corpora extranea, qualia sunt grumus sanguinis, pus, &c. Hæc siquidem in urina diu immerfa, particulas fabulosas arripiunt, retinent, suæ moli addunt. Unde nascitur nucleus crustâ salinâ obductus, qui, sicut reliqua calculi rudimenta prius memorata, sensim capit incrementum.

XXVII. Postquam ex causis jam traditis calculi nucleus intra renes conficitur, quandoque sine ulla molestia in vesicam decidit. Si autem major sit ejus moles intra pelvim aut ureterem hærens, paroxysmum nephriticum horrendis cum symptomatibus excitat.

XXVIII. Hujusmodi paroxysmi à calculo orti signa diagnostica sunt; dolor circa regionem lumborum aut ureterum, ructus, nausea, vomitus, & retractio testis lateris affecti ob causam prius narratam. Quando corpus majori motu concutitur, ut in curru, præsertim dum per vias inæquales aut lapidibus stratas movetur, calculus vasa vicina dilacerando sanguinis mictum plerumque inducit. Ingruente paroxysmo urina tenuis & pallida redditur, quippe pelvis vel ureter obturati particulis urinæ solidioribus difficilem transitum præbent; dum fistulæ renales contrahuntur, quia scabra calculi superficies nervos irritat, & hæ fistulæ contractæ urinam crassiorem intercipiunt. Paroxysmo tandem finito turbida admodum effluit urina, laxatis sciz. fistulis & calculo amoto, quæ salis terræque transitum antea prohibuerant. Hæ igitur particulæ crassiores ibi magnâ copiâ coacervatæ, aperto jam ore ureteris, stimuloque cessante, liberius nunc fluunt: & si compagis adeò laxæ sit calculus, ut ab urina præterlabente quædam à superficie ejus partes abradi deterique possint, urina materiâ quadam fabulosâ repleta profluit: & si scabra magis & angulosa sit ejus superficies, ita ut vasa sanguifera



guifera attritu moleſto laceret, etiam proxymî tempore, & licet corpus nequaquam concutiatur, ſanguinem unâ cum urina excerni ſæpiùs videbimus.

XXIX. Quod ad morbi hujus prognofin attinet, ſi à labe hæreditariâ provenerit, curatio integra vix expectanda eſt. Si ſymptomata vehementia & magis diuturna fuerint, periculum gravius ægro minitatur; quatenus inde designantur calculi magnitudo, tranſitus ejus difficilis, & renes vel ureteres valde læſi. Et admodum periculofus eſt hic morbus ſi inflammatio ſupervenerit,

XXX. Cæterùm ſi felicem huic morbo medelam adhibere velimus, tentandum eſt ut calculi in veſicam deſcenſus facilior reddatur; quod perficitur laxando ureteres per clyſmata emollientia injecta, quibus adhibitis dum inteſtina craſſa tepido liquore repleta ſunt, renes & ureteres, qui in eorum vicinio hærent, blando tepore foventur. In eundem quoque finem conſpirant ſemicu-  
pia illa apud veteres tanta cum laude decantata. Oportet præ-  
terea pelvis & ureterum cavitatem oblini per medicamenta hu-  
mida, blanda, oleoſa, ſicut decocta herbarum emollientium; in-  
fuſiones ſeminum oleoſorum, lini nempe, &c. olea amygdalorum,  
&c. hæc enim dum ureteris cavitatem lubricando calculi tran-  
ſitum promovent, hoc ulterius habent commodi, quòd utiliſſi-  
ma ſint quæ tunicam ejus intimam contra calculi ſcabritiem e-  
gregiè tueantur. Hujus quoque deſcenſus facilior redditur,  
inteſtina per lenia purgantia evacuando, quo minus renes  
& ureteres nimium premant. Et dum calculo hâc ratione via  
patefacta eſt, ſimul is detrudendus eſt per diuretica leniora, quæ  
majorem urinæ copiam ad renes derivando eum deorſum propel-  
lunt. Huic quoque fini inſerviunt emetica, quæ nervos ventri-  
culi irritando muſculos quoque abdominales in contractionem  
ſollicitant; & contractis his muſculis viſcera omnia contra renes  
& ureteres premuntur. Sed ſumma hic adhibenda eſt cautela; ſi  
enim tanta ſit calculi moles, ut per hanc vim deorſum premi  
nequeat, ſæviùs ingraveſcet malum. Ut faciliùs tranſeat calcu-  
lus, moles ejus minuenda eſt: quod quidem partim vi vitæ per-  
ficitur, ſi modò calculi compages non nimis firma fuerit. De-  
teritur etiam per lenia diuretica. Quo verò melius ſolvatur,  
exhiben-



exhibendus est sapo, quatenus nullum ferè medicamentum adhuc cognitum, & quod nullo periculo corpori ingerere licet, huic fini magis conferat quàm sapo, si modo largâ satis dosi exhibeatur. Sed cum hujus morbi symptomata quandoque ita sæviant, ut vix tolerari possint, necesse est hæc leniri: cumque inter horum sævissima dolor jure merito reputetur, huic primò occurrendum. Hic optimè lenitur, si methodo supradictæ adji- ciatur V. S. quæ magis requiritur, quoniam inflammatio, quæ haud rarò supervenit, si fieri potest, præcipuè præcavenda; post verò hanc peractam, & evacuantia supradicta exhibita, opium exhibere licet, quo spirituum perturbatio sistatur, quâ sedatâ, reliqua omnia, quorum causa extiterat, symptomata evanescent.

Si verò, his omnibus incassum tentatis, calculus adhuc impactus hæreat, nulla ferè præterea superest ratio eum exinde auferendi, nisi ut operatio nephrotomiæ perficiatur; quam tamen sine summo periculo nemo aggredi potest.

XXXI. Si methodo præcedente calculus per ureteres in vesicam feratur, descensus ejus cognoscitur ex signis omnibus jam memoratis unâ cum doloris subita remissione; &, si magnus sit calculus, signa ejus in vesica statim se prodent. Nucleus iste è renibus in vesicam descendens, quandoque ibi retentus, calculi majoris rudimentum devenit. Interdum etiam calculus intra vesicam ipsam, sine ullo nucleo à renibus descendente, conficitur, & ortus ejus in vesica pendet à similibus causis ac in pelvi. Hunc calculum in vesica hærare dignoscere possumus; per dolorem quem ibi excitat suo pondere & scabritie, si modo superficies ejus inæqualis sit. Per urinam guttatim emissam; quia calculus pondere suo ad partem dependentem ruit, collumque vesicæ obstruit; immò quandoque adeò occluditur vesicæ apertura, ut ne vel guttula inde effluere possit, donec ægri in dorsum decubitu calculus in vesicam retrolabatur. Per nifum perpetuum ad urinam reddendam; quia si calculus ad collum vesicæ diu hæreat, urina magnâ copiâ colligitur, vesicam distendit, & acrimoniâ, quam ibi stagnando acquisivit, irritat, dum calculus ipse tunicam ejus intimam vellicat; vesica autem ita distenta & irritata indefinenter se contrahit; nec quidem cessat adhuc nifus post calculum retrolapsum, & urinam omnem expulsam, quamdiu



quamdiu calculus intus manens vesicæ fibras lacerat. Per mucî stillicidium; quippe calculus scabritie suâ mucum abradit, quo vesicæ cavitas prius obfita erat; & quoniam major copia mucî excernitur, quo magis & sæpius se contrahunt vesicæ tunicæ. Per tenesmum in reddenda urina; quia commercium intercedit inter nervos vesicæ & intestini recti. Hunc verò morbum existere certissimè constat, si, digito intra anum, vel cathetere intra vesicam immisissis, calculum sentire possimus. Hic calculus, si intra vesicam diu retineatur, membranam ejus intimam lacerando, inflammationem, febrim & ulcera producet, præter symptomata quæ ex urinæ retentione oriuntur, & de quibus postea dicendi dabitur occasio.

XXXII. Quamprimum autem per signa propria diagnostica cognitum fuerit calculum in vesica hære, ejus expulsio summa cum cura illicò sollicitanda est; & iisdem ferè methodis perficitur, quæ pro calculo in renibus aut ureteribus requiruntur. Superficies membranæ intimæ vesicæ defendatur contra injurias, quas aliter à calculi scabritie acciperet, injectione olei per urethram; dum omnia symptomata, sæva simul ac apparent, leniantur per methodum antephlogisticam, & opiata summa cum cautela exhibita. Quandoque tamen tanta est calculi magnitudo, ut post omnia hæc tentata, adhucdum intra vesicam impactus hæreat, & tunc æger à manu tantum chirurgi solamen expectare debet. Calculus è vesica urinaria expulsus sæpe in urethra obstructus manet; ibique sævissimum dolorem excitat, urinam intercipit, & haud rarò hæmorrhagiam, ruptis urethræ vasculis, producit. Per hæc signa, & per tactum dignoscere possumus calculum hîc obstrui. Ad eum verò inde auferendum urethra fotu relaxanda est; interna ejus cavitas lubrica fiat per olei injectionem; calculi expulsio ope specilli adjuvetur; dum interim resistentia aëris suctione tollitur. Si autem, his omnibus frustra tentatis, calculus nihilominus hæreat, urethra scalpello aperienda est.

Superatâ denique causâ unius paroxysmi, & calculo ablato, novi calculi incrementum impediendum est, evitando quantum fieri potest omnes ejus causas procataëcticas; usu ciborum quorum facillima sit concoctio; quales sunt ova, carnes pullorum,

aut



aut juniorum animalium, vel eorum juscula, lac recens. Potus interim sit aqua pura, limpida, per se, vel vino albo commista. Aer temperatus & purus eligendus. Somno leni non nimis diu protracto indulgendum. Modica quoque exercitia pro ratione virium nunquam negligenda: dum animi affectus in justo moderamine fervantur. Et certe si qui alii, hi, quibus morbus hic patrius est, ad methodum prophylacticam attendere debent.

XXXIII. Quoniam verò non sufficit cognoscere quomodo fecernatur, aut excernatur urina, nec qualis sit jam excreta; nisi ab ejus inspectione quodammodo judicare possimus de statu corporis: paucula adjiciemus de urina, quatenus inde licet judicium ferre de statu præsentis fluidorum vasorumque, & prædicere ea quæ expectanda sunt ex hoc vel illo eorum statu.

Si urinæ copia nimis augeatur, indicat quædam sequentium: Vasa renalia nimis laxa. Magnam copiam potûs ingestam fuisse; cum urina ipsa pars aquosa sanguinis sit. Cæteras excretiones imminutas; cum enim sanguinis partes inutiles excernantur per plurimas vias, si quædam harum obstruantur, major copia liquoris excrementitii per reliquas transibit. Miscelam aquæ cum reliquo sanguine impeditam fuisse; particulæ enim aquosæ crassioribus non immistæ citius effluent. Partum nuper prægressum; tempore enim gestationis vasa omnia renalia comprimebantur, hac autem pressurâ sublatâ laxantur, & humores majore copiâ transmittunt. Diuretica assumpta; quæ sanguinis crassum solvunt, dum vasa in contractionem leniter stimulant.

XXXIV. Cum urina tenuior pars sanguinis fuerit, à nimio ejus profluvio divinare licet crassitiem humorum qui remanent, & omnia symptomata inde pendentia: cujusmodi est sitis sive siccitas membranæ cingentis internam cavitatem faucium, œsophagi, & ventriculi. Humores enim ob hanc crassitiem ægrè transeunt per vasa exhalantia, quæ ad hujus membranæ superficiem aperta hiant. Quia autem liquor iste ad alimentum digerendum haud parùm conducebat, ex ejus defectu cibi concoctio impediatur, chylus crudus erit, difficilius assimilabitur sanguinis indoli, minusque aptus evadet copori nutriendo. Propter hoc, & quia liquor iste crassus intrare nequit vascula minima in quibus perficitur nutritio, macies & debilitas oriuntur. Ex hac quo-



quoque humorum crassitie anxietas plerumque oritur: sanguis enim parte fluidiore orbatus circa hepar, ubi per capsulæ Glissonianæ ramos circuitus languidior est, stagnare incipit; & ibi stagnans resistantiam præbet sanguini per venas meseraicas à visceribus omnibus abdominalibus redeunti. Cum verò retardatur humorum motus à liene in venam portarum, sanguis intra ejus cellulas obstructus hærebit; ibique & intra hepar collectus vasa majora distendet, minora comprimet; sensum ponderis ineffabilem, & maximè ingratum, *anxietatem* dictum, excitabit; & si diu circa hæc viscera stagnat, corrumpitur, acrimoniam acquirit, tandemque in terribilem illum liquorem, quem antiqui *atram bilem* dixere, degenerat; qui simul in corpore natus horrenda symptomata secum fert. Crassus denique hic humor vasa obstruendo inflammationum, suppurationum, aut gangrænarum causa quandoque est.

XXXV. Copia urinæ minuta denotat quædam sequentium. Vias uriniferas constrictas; hæcque constrictio pendere potest, ab earum exulceratione, & urinâ eas jam exulceratas acrimoniâ suâ irritante; medicamentis acribus, stimulantibus assumptis; ab affectione quâdam hysterica. Denotat easdem compressas aut obturatas tumore, calculo, vel plethora, quæ vasa renum sanguinea distendendo vasa urinaria comprimit, & urinam intercipit. Denotat quoque potius defectum; reliquas excretiones auctas, vel humorum spissitudinem.

XXXVI. Cum tanta humorum copia sub formâ urinæ è corpore eliminari soleat, ex retentione ejus prædicere licet vasorum repletionem futuram. Quando autem vasa majora repleta distenduntur, minora comprimunt, transitumque humorum liberum per ea impediunt; & quia motus voluntarii pendere videntur ex motu humorum per vascula minima: ex horum compressione sequitur socordia, ignavia, ita ut æger ad motus edendos ineptus reddatur. Hujusmodi autem distentioni cerebri vasa maximè obnoxia sunt; quippe hæc, quamprimum cranium intraverint, debiliora fiunt: hæc distenta nervorum initia comprimunt, eorumque actionem destruunt. Quoniam verò ex his nervis non solum motus voluntarii, sed sensus quoque externi internique pendent, ex his compressis torpor, gravedo, somnolentia



lencia oriuntur, acies omnium sensuum obtunditur: & si hæc compressio tanta sit, ut nervorum actio inde omnino sistatur, tandem apoplexia supervenit. Præter hæc verò incommoda quæ urinæ retentio corpori inducit, vasa omnia replendo, alia quoque proveniunt ab ejus acrimonia. Ex cognitâ enim urinæ naturâ, haud difficile erit hariolari sales ejus intra corpus retentos, & calore ejus fotos, ex semifixis, blandis, neutris, in volatiles, acres immutatum iri, & ad naturam alcalinam propius accessuros esse; dum olea ex blandis, rancida & acerrima devenient, & sales, quos antea intra thecas quasi cohibitos retinere solebant, à suis amplexibus nunc dimittent. Urina igitur ex hujusmodi partibus constans, & corporis calore diu fota, cum reliquis humoribus per corpus circumacta, spiculis suis acribus è vasorum lateribus particulas perpetuò abradet, & tabem totius corporis inducet, donec tandem vasorum latera adeo deterantur, ut per hæc spicula in ea adacta disrumpantur, & humores effundant. Si verò hæc liquorum effusio accideret circa cerebrum, cujus vasa tenerrima facillimè rumpuntur, humor effusus cerebrum comprimendo apoplexiam, paraplegiam, hæmi-plegiam, paralyfin integram, vel unius tantum partis producet; quoniam ab impedita actione nervorum nascuntur hæc omnia symptomata, & horum unum vel aliud oritur, prout partes diversæ cerebri, vel tota ejus moles comprimitur. Sanguis iste acris, effusus, cerebrum premens, & nervos simul vellicans, epilepsiam quoque generare potest. Tanta etiam est acrimonia hujus liquoris, ut cum reliquis humoribus ad cerebrum delatus, licet vasa ejus non disrumpat, ea tamen stimulando inflammations, convulsiones & phrenitides excitet; præcipuè in morbis acutis, quoniam tunc sanguis in indolem inflammatoriam jam nimis proclivis est. Acres quoque hi sales intra vasa retenti non modò solida irritabunt, sed fluida etiam dissolvent.

XXXVII. Urina nimis limpida indicat vias uriniferas contractas aut obturatas, quibus impeditur transitus partium crassiorum. Intimam miscelam olei, terræ & salis sanguinis, dum aquæ misturam respuunt. Vasorum & viscerum debilitatem; quoniam ex oleo color urinæ citrina utplurimum pendet, & quo debiliora sunt vasa & viscera, eo minor erit corporis calor;



calore verò imminuto, minùs quoque oleum in flavedinem verget.

XXXVIII. Quoniam, dum talis urina redditur, sales & olea intra corpus retinentur, omnia ferè symptomata jam memorata ab urinæ acrimoniâ pendentia hîc prædicenda sunt. In morbis vel acutis vel chronicis, si hujusmodi urina diu duraverit, denotat particulas crassiores diu retentas, magnâ copiâ intra vasa collectas, & vi vasorum adeo compactas, ut solvi & inde amoveri vix possint; ideoque haud felix augurium hinc desumendum est.

XXXIX. Urina, quæ habet colorem suum naturalem in rubrum mutatum, & quæ caret sedimento, ingentem indicat humorum motum. Particulas ex quibus ii constituuntur admodum inter se exagitatas. Fluidorum quoque & solidorum magnum attritum, & calorem ex his ortum, quo olei color natus summopere mutatur. Sanguinis partes crassiores, ex quibus sedimentum confici solebat, intimè commistas, & intra corpus retentas. Vias urinarias quodammodo obstructas. Materiem morbificam nondum solutam.

XL. Ex summo attritu & calore, qui hîc indicantur, ominari licet humorum corruptelam, vasorum destructionem: quippe ex celeri humorum motu latera vasorum citò deteruntur, præsertim cum humores calore acres redditi per ea ferantur, dum omnino inepti sunt hi humores qui damna repararent ab attritu producta. Quot verò strages inter vasa cerebri tenera editurus sit hujusmodi sanguis tam celeri motu ibi raptus, ex jam dictis facile patebit. Quatenus verò indicat particulas crassiores intimè commistas, quando hujusmodi urina redditur tempore morbi, hunc non citò solutum fore inde prædicere licet: materies enim morbifica ita impacta non facile viribus vitæ adeo subigetur, ut per vasa cum reliquo sanguine circumferatur, & è corpore expellatur.

XLI. Si urina rubra sit, demittens sedimentum instar lateris cocti contusi, indicat, uti prior, motum humorum validum, sanguinis acrimoniam; quâ particulae, quæ vasorum latera conficiunt, abraduntur: vasa renalia laxa, quæ particulas has crassiores transire sinunt.

XLII. Ex humorum acrimonia, quæ hîc indicatur, & motu eorum



eorum celeri, prædicendum est, vasorum omnium latera magnum dispendium passura; & cum hæc ægrè reficiantur sanguine corrupto, metuendum ne totum corpus tabescat. Ex acrimonia celerique motu humorum, & vasorum debilitate rupturæ periculum vasculis imminet; unde expectare licet sanguinis sputum ex ruptis vasis pulmonalibus; apoplexiam, paralyfin; omniaque quæ pendent à ruptis cerebri vasis: pustulas in cuticula ex ruptis vasculis subcutaneis. Quoniam verò sales nostri ob attritum hunc, & calorem in naturam alcalinam propius vergunt, & sales omnes alcalini cum sanguine commisti eum solvunt, ex hac urina augurari possumus humorum dissolutionem; & inde hydropem, quia humores ita colliquati intra corporis cavitates per vasa exhalantia liberiùs fluunt; dum vasa inhalantia debilitata munere suo haud ritè funguntur. Propter hanc quoque dissolutionem humorum expectare licet, eos è corpore transituros per sudores, & diarrhoeas colliquativas.

XLIII. Si urina fusca sit, livida, aut viridis, denotat plerumque atram bilem solutam, & cum sanguine commistam. Hæc circa hypochondria stagnans pro diversa mora quam ibi fecit, hos varios colores acquirit. Ex ejus mixtura cum reliquo sanguine prædicenda sunt sanguinis solutio, acrimonia, & effectus ab acri soluto sanguine pendentes.

XLIV. Urina nigra, quatenus gangrænam in quavis parte corporis natam plerumque indicat, pessima portendit; præcipuè si sedimentum quoque nigrum habeat.

XLV. Urina croceo colore prædita, & omnia ei immixta eodem colore tingens, denotat ductus biliosos quodammodo obstructos, & impeditum bilis transitum intra intestinum, quo illa in venam cavam regurgitare cogitur, & cum sanguine mixta omnes ejus secretiones eodem colore imbuunt.

Ex acri hac bile cum humoribus mixta prædicere licet sanguinis crasin solutam fore, & inde hydropem. Ex impedito bilis transitu intra intestina, cibi difficilem concoctionem, cum nihil ejus partes solvat magis & attenuet, quo humoribus inquilinis assimiletur. Album colorem excrementorum, quia color eorum flavus à bile ut plurimum pendet. Torporem ex humoribus viscidis, ob cibum haud ritè digestum. Ex ductibus denique biliosis distentis, ob prohibitam bilis excretionem, sensus ponderis circa hepar expectandus est.

XLVI.



XLVI. Odor & sapor urinæ foetidus designant humorum putredinem, vel per totum corpus, vel saltem intra vias urinarias. Ideoque secundum varios hujus corruptelæ gradus diversum præfagium inde desumitur.

XLVII. Urina crassa, quæ non residet, denotat materiem morbificam concoqui haud adhuc incepisse. Ostendit itaque morbum diuturnum fore, si vires adfuerint; si verò imbecillis sit æger, mortem ejus prænuntiant. Si urina primò clara sit, postea verò turbida deveniat, ostendit naturam coctionem incipere. Ideoque præfagium salutare inde habemus.

XLVIII. Urina, quæ candidum sedimentum habet læveque, & æquale per omne tempus dum de morbo judicatur, securitatem & morbum fore brevem significat; quia urina hæc naturali proxima. Si verò varia sit urina, interdum pura, interdum sedimentum candidum ac læve deponens, designat naturam morbi coctionem tentare, sed vires vitæ haud valere eam perficere. Inde augurari possumus morbum diuturnum fore.

XLIX. Quandoque sanguis cum urina profluit, & denotat vasa renalia admodum laxa, quæ eum transire sinunt; vel sanguinem acrem, qui renum vascula erodit. Si magna sanguinis copia effluerit, omnia præfagit symptomata quæ sanguinis nimiam evacuationem sequuntur. Et si ab humorum acrimonia provenerit, quod per signa propria sanguinis acrimoniæ dignoscitur, præfagium quoque ejus inde hauriendum est.

Si chylus cum urina profluxerit, indicat vasa renalia laxa; & præfagit tabem ex defectu nutrimenti. Pus carunculæ, &c. in urina denotant vias uriniferas exulceratas. Ulcera verò in his locis periculosa sunt, quia acri urinâ perpetuò humectantur.

L. Plura alia sunt de urina observatu digna: ne autem limites hujusmodi dissertatiunculæ excedam, finem ei imponam, hanc unam cautelam addendo, signis nempe ab urina solum desumptis, neglectis omnibus aliis, haud integrè fidendum esse, quatenus urina variis mutationibus ex diversis causis obnoxia est. Si tamen hæc observentur, & cautè cum aliis comparantur, haud parum ad statum corporis dignoscendum conducere possunt.